

七言歌行卷第三

唐詩選弟九

長沙湘潭王闔運字壬父撰

序目

岑參二十二首 高適一十九首 杜甫六十九首
畢曜一首 王季友四首 嚴武一首 劉長卿四
首 李嘉祐一首 常建二首 張潮一首 元結
四首 韓翃二首 錢起一首 郎士元一首 韋
應物二首 崔元翰一首 武元衡一首 楊巨源
一首 李渤一首 李德裕一首 李涉一十首
右錄二十一人詩百四十九首

卷九
職方郎中兼侍御史南陽岑參

青門歌送東臺張判官

青門金鎖平旦開城頭日出使車回青門柳枝正堪折
路旁一日幾人別東出青門路不窮驛樓官樹灞陵東
花撲征衣看似繡雲隨去馬色疑驄胡姬酒壚日未午
絲繩玉缸酒如乳灞頭落花沒馬蹏昨夜微雨花成泥
黃鸝翅溼飛屢低關東尺書醉懶題須臾望君不可見
揚鞭飛鞚疾於箭借問使乎何時來莫作東飛伯勞西
飛燕

梁園歌送河南王說判官

君不見梁孝王修竹園頽牆隱鱗勢仍存嬌蛾嚬臉成
艸蔓羅帷珠簾空竹根大梁一旦人代改秋月春風不
相待池中幾度雁新來洲上千年鶴應在梁園二月黎
花飛卻似梁王雪下時當時置酒延枚叟肯料平臺狐
兔走萬事翻覆如浮雲昔人空在今人口單父古來稱
宓生祇今爲政有吾兄輜軒若過梁園道應傍琴臺聞
政聲

白雪歌送武判官歸京

北風捲地百艸折胡天八月卽飛雪忽如一夜春風來
千樹萬樹梨花開散入珠簾溼羅幙狐裘不煖錦衾薄

將軍角弓不得控都護鐵衣冷難著瀚海闌干百丈冰
愁雲黯淡萬里凝中軍置酒飲歸客胡琴琵琶與羌笛
紛紛暮雪下轅門風掣紅旗凍不翻輪臺東門送君去
去時雪滿天山路山回路轉不見君雪上空畱馬行處
走馬川行奉送出師西征

君不見走馬川行雪海邊平沙莽莽黃入天輪臺九月
風夜吼一川碎石大如斗隨風滿地石亂走匈奴艸黃
馬正肥金山西見煙塵飛漢家大將西出師將軍金甲
夜不脫半夜軍行戈相撥風頭如刀面如割馬毛帶雪
汗氣蒸五花連錢旋作冰幙中草檄硯水凝虜騎聞之

應膽懾料知短兵不敢接車師西門佇獻捷

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠黎
單于已在金山西戍樓西望煙塵黑漢兵屯在輪臺北
上將擁旄西出征平明吹笛大軍行四邊伐鼓雪海涌
三軍大呼陰山動虜塞兵氣連雲屯戰場白骨纏草根
劍河風急雲片闊沙口石凍馬蹏脫亞相勤王甘苦辛
誓將報主靜邊塵古來青史誰不見今見功名勝古人
天山雪歌送蕭治歸京

天山有雪常不開千峯萬嶺雪崔嵬北風夜卷赤亭口

卷九
三
哥行
一夜天山雪更厚能兼漢月照銀山復逐胡風過鐵關
交河城邊飛鳥絕輪臺路上馬蹏滑晝靄寒氛萬里凝
闌干陰崖千丈冰將軍狐裘臥不煖都護寶刀凍欲斷
正是天山雪下時送君走馬歸京師雪中何以贈君別
惟有青青松樹枝

函谷關歌送劉評事使關西

君不見函谷關崩城毀壁至今在樹根艸蔓遮古道空
谷千年長不改寂寞無人空舊山聖朝無外不須關白
馬公孫何處去青牛老人更不還蒼苔白骨空滿地月
與古時長相似野花不省見行人山鳥何曾識關吏故

人方乘使者車吾知郭丹卻不如請君時憶關外客行
到關西多致書

與獨孤漸道別長句兼呈嚴八侍御
輪臺客舍春艸滿潁陽歸客腸堪斷窮荒絕漠鳥不飛
萬磧千山寢猶懶憐君白面一書生讀書千卷未成名
五侯貴門腳不到數畝山田身自耕興來浪迹無遠近
及至辭家憶鄉信無事垂鞭信馬頭西南幾欲窮天盡
奉使三年獨未歸邊頭詞客舊來稀借問君來得幾日
到家不覺換春衣高齋清晝捲帷幙紗帽接羅幘不著
中酒朝眠日色高彈棋夜半燈花落冰片高堆金錯盤

滿堂凜凜五月寒桂林蒲萄新吐蔓武城刺蜜未可餐
軍中置酒夜撾鼓錦筵紅燭月未午花門將軍善胡歌
葉河蕃王能漢語知爾園林壓渭濱夫人堂上泣羅裙
魚龍川北盤谿雨烏鼠山西洮水雲臺中嚴公於我厚
別後新詩滿人口自憐棄置天西頭因君爲問相思否
送費子歸武昌

漢陽歸客悲秋艸旅舍葉飛愁不埽秋來倍憶武昌魚
夢著只在巴陵道曾隨上將過祈連離家十年恆在邊
劍鋒可惜虛用盡馬蹏無事今已穿知君開館常愛客
携糒百金每一擲平生有錢將與人江上故園空四壁

吾觀費子毛骨奇廣眉大口仍赤髭看君失路尙如此
人生貴賤那得知高秋八月歸南楚東門一壺聊出祖
路指鳳皇山北雲衣霑鸚鵡洲邊雨勿歎蹉跎白髮新
應須守道勿羞貧男兒何必戀妻子莫向江邨老卻人
涼州館中與諸判官夜集

彎彎月出挂城頭城頭月出照涼州涼州七里十萬家
胡人半解彈琵琶琵琶一曲腸堪斷風蕭蕭兮夜漫漫
河西幕中多故人故人別來三五春花門樓前見秋艸
豈能貧賤相看老一生大笑能幾回斗酒相逢須醉倒
偃師東與韓樽同詣景雲暉上人卽事

山陰老僧解楞伽
潁陽歸客遠相過
煙淡艸溼昨夜雨
雨後秋風渡漕河
空山終日塵事少
平郊遠見行人小
尙書磧上黃昏鐘
別駕渡頭一歸鳥

喜韓樽相過

三月灞陵春已老
故人相逢耐醉倒
甕頭春酒黃花脂
祿米只充沽酒貲
長安城中足年少
獨共韓侯開口笑
桃花點地紅斑斑
有酒畱君且莫還
與君兄弟日攜手
世上虛名好是閒

太白胡僧歌

并序

太白中峯絕頂有胡僧
不知幾百歲
眉長數寸身不

製繒帛衣以艸葉恆持楞伽經雲壁迴絕人迹罕到
嘗東峯有鬪虎弱者將歿僧杖而解之西湫有毒龍
久而爲患僧器而貯之商山趙叟前年采伏苓淡入
太白偶值此僧訪我而說予恆有獨往之意聞而悅
之乃爲歌曰

聞有胡僧在太白蘭若去天三百尺一持楞伽入中峯
世人難見但聞鐘窗邊錫杖解兩虎牀下鉢盂藏一龍
艸衣不鍼復不線兩耳垂肩眉覆面此僧年幾那得知
手種青松今十圍心隨流水同清淨身與浮雲無是非
商山老人已曾識願一見之何由得山中有僧人不知

城裏看山空黛色

衛節度赤驃馬歌

君家赤驃畫不得一團旋風桃花色紅纓紫鞵珊瑚鞭
玉鞍錦韉黃金勒請君韞出看君騎尾長牽地如紅絲
自矜諸馬皆不及卻憶百金新買時香街紫陌鳳城內
滿城見者誰不愛揚鞭驟急白汗流弄影行驕碧蹏碎
紫髯胡雛金剪刀平明剪出三髮高櫪上看時獨意氣
眾中牽出偏雄豪騎將獵向南山口城南狐兔不復有
艸頭一點疾如飛卻使蒼鷹翻向後憶昨看君朝未央
鳴珂擁蓋滿路香始知邊將真富貴可憐人馬相輝光

男兒稱意得如此駿馬長鳴北風起待君東去埽胡塵
爲君一日行千里

裴將軍宅蘆管歌

遼東九月蘆葉斷遼東小兒采蘆管可憐新管清且悲
一曲風飄海頭滿海樹蕭索天雨霜管聲寥亮月蒼蒼
白狼河北堪愁恨元菟城南皆斷腸遼東將軍長安宅
美人蘆管會佳客弄調啾飈勝洞簫發聲窈窕欺橫笛
夜半高堂客未回祇將蘆管送君杯巧能陌上驚楊柳
復向園中誤落梅諸客愛之聽未足高捲珠簾列紅燭
將軍醉舞不肯休更使美人歌一曲

玉門關蓋將軍歌

蓋將軍眞丈夫行年三十執金吾身長七尺頗有鬚玉
門關城迴且孤黃沙萬里白艸枯南鄰犬戎北接胡將
軍到來備不虞五千甲兵膽力麤軍中無事但歡娛煖
屋繡簾紅地爐織成壁衣花攣毬燈前侍婢瀉玉壺金
鎗亂點野駝酥紫紱金章左右趨問著只是蒼頭奴美
人一雙閑且都朱唇翠眉映明矐清歌一曲世所無今
日喜聞鳳將雛可憐絕勝秦羅敷使君五馬謾踟躕野
艸繡窠紫羅襦紅牙縷馬對擣菹玉盤纖手撒作盧眾
中誇道不曾輸櫪上昂昂皆駿駒桃花叱撥價最殊騎

將獵向城南隅臘日射殺千年狐我來塞外按邊儲爲
君取醉酒剩沽醉爭酒盞相喧呼忽憶咸陽舊酒徒
西亭子送李司馬

高高亭子郡城西直上千尺與雲齊盤崖緣壁試攀躋
羣山向下飛鳥低使君五馬天半嘶絲繩玉壺爲君提
坐來一望無端倪紅花綠柳鶯亂啼千家萬井連回谿
酒行未醉聞暮雞點筆操紙爲君題爲君題惜解攜艸
萋萋沒馬蹏

漁父
扁舟滄浪叟心與滄浪清不自道鄉里無人知姓名朝

從灘上飯莫向蘆中宿歌竟還復歌手持一竿竹竿頭
釣絲長丈餘鼓棹乘流無定居世人那得識淡意此翁
取適非取魚

登古鄴城

下馬登鄴城城空復何見東風吹野火暮入飛雲殿城
隅南對望靈臺漳水東流不復回武帝宮中人去盡年
年春色爲誰來

感遇

北山有芳杜靡靡花正發未及得采之秋風忽吹殺君
不見拂雲百丈青松柯縱使秋風無奈何四時常作青

黛色可憐杜花不相識

送郭又禩言

地上青艸出經冬今始歸博陵無近信猶未換春衣憐
汝不忍別送汝上酒樓初行莫早發且宿灞橋頭功名
須及早歲月莫虛擲早年已工詩近日兼注易何時過
東洛早晚渡盟津朝歌城邊柳彈地邯鄲道上花撲人
去年四月初我正在河朔曾上君家縣北樓樓上分明
見恆嶽中山明府待君來須計行程及早回到家速覓
長安使待汝書封我自開

送魏升卿擢第歸東都因懷魏校書陸渾喬潭